

ЛҰИМА СЭРИПОС

22 февраля
2017 года
№4
(1142)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года

Хум хѳтпат янытлыяннѳв!



С. Хозумов мим хури

Хурит Сергей Хозумов ёсал хѳйтнѳ хум Алексей Волков
ѳт пѳслым ѳлы. Мѳньщи хум урыл 8-9 лѳпсыт ловинтѳн.

Ты
номерт
ЛОВИНЪТѢН:

Урккың кѳщайт
тѳкыщ
пащралаңкве
патвѳсыт

2

Нѳлм
рѳтанув палт
мѳйлункве
ялѳн

3

Хѳрум
мѳньщи пыг
лусыгасыт

8-9

Тав Лѳсум
мѳньщи
нѳврамаквет
ханищтас

12

Вѳт тѳл
рѳпитан
музей-кол

16

ЛЯХХАЛЫТ

Урккың кўщаит тākыш пащралаңкве патвёсыт



Н.Чекунова, Е.Кривобоков, В.Терентьев

Ханты-Мансийск ўст РИЦ «Югра» колт ляххал тотнэ маҳум акван-атапāлвёсыт, тув ань округ янытыл рўпата уральтан тēла палт пуңктотнэ ойка Евгений Кривобоков ёхталас, тав ётэ вāнын хōтпаге олсыг – охрана труда тēла вāрнэ нэ Наталья Чекунова ос юристыг олнэ хум Владислав Терентьев.

Тан та ъвылтыт потыртасыт, ань ювле хультум 2016 тал сыс округт олнэ мир рўпитанёныл магыс олныл мўсхал щирыл ойтыглавёсыт ман āти, рўпата минэ маҳум сākкон щирыл рўпитёгыт ман āти.

Евгений Кривобоков лāвме щирыл, тан округт вāрнэ рўпатаныл Россияв янытыл олнэ 82 округыт ос областит халт шар мāk ёмас мины, тан отделаныл янытлаве.

2016 талт округ янытыл тан 3 сōтыра 622 рўпата мāt уральтасаныл. Та порат сака сāv лўль пищ тāра-паттысыт. 2015 талныл 28 процент арыг сāvнув тāрвитың тēла хōнтсыт. Маҳум ань тананылн свонитёгыт, тэланыл урыл потыртёгыт – 25 сōтыра 658 хōтпа

лāтың кётыс. Хотьют хōт уркуптавес манос лўкамтавес, Государственный инспекция труда мāt рўпитан хōтпат тāра та рўпатан минёгыт, кўщаит ёт потыртёгыт, ёрнэ нэпакыт мўсхал щирыл ловиньтыяныл, ханищтыяныл.

Ты кўщай ойка лāвыс: «Мāн, государственный инспекция труда колт рўпитан маҳум, таи тāра-паттысўв, округувт ос Россияв янытыл рўпата минэ сāv хōтпа рўпата сākкон щирыл ат рўпитёгыт, таве то-растыяныл».

Молты тал сыс рўпата уральтан госинспекторыт 11 сōтыра 381 лўльсаң вāрнэ тēлат тāра-паттысыт. Ты 2015 талныл 28 сāvит процент ущпылнёг нōх-лапыс. Маҳум яныгыш олныл ат ойтает,

манос лāпалāлавет, мощшал ойтает.

Ты маҳум кисхат-нёныл юи-пāлт, сākкон нэпакыт суссылтанёныл юи-пāлт, 13 сōтыра 819 хōтпа рўпата олнаныл ойтвёсыт – 736 миллион арыг сāvит солкōви. Рўпата уральтан инспекторыт 6 сōтыра 581 пищмал ёхталавёсыт. Ты пищмат щирыл тан 2 сōтыра 802 рўпата уральтасыт. Ат сōтыра арыг хōтпа тан палтаныл тан-ти ёхталасыт, тэланыл урыл полщ тотсыт.

Евгений Кривобоков тох лāвыс: «Мāн таи ъс сунсёв, ань хōтпа рўпататёт сākкон щирыл рўпиты ман āти. Тав ёрнэ нэпакытыл ат те вāрвес, мāн тāра прокуратуран лāтың кётёв, тувыл та рўпата кўщай та пуваве, китыглаве, ань хōтпа манрыг ёрнэ нэпактāl рўпиты».

Владислав Терентьев лāвме щирыл, округт 64 организацият маҳум олныл ат ойтсаныл, манос мощшал ойтсаныл. 2016 тал сыс 872 миллион 804 сōтыра солкōви мирн ат ойтвес, тан ань арнтаг та хультсыт.

Ты хум лāвыс: «Тох та порат ёмталы, хунь организация кўщай хōтпа рўпитан маҳманё ёт тāра ат ойтхаты, манос олн ат оныщи. Кол ўнттын мāt тамле вāрмальсака тāрвитың, ань маҳум олнэ кол сака ат ёвтёгыт. Колыт ўнттавет, ос нэмхотьютн ат ёвтавет. Рўпитан хōтпа магыс олн āтим. Тувыл кол ўнттын мāt ёрнэ матыр

ёвтнэ магыс олн ъс āтим. Тан рўпитан мāныл та пойтёгыт, элаль рўпитаңкве ат вёрмёгыт, ос олн кāтын-паттуңкве ат вёрмёгыт. Хунь нāлок-олн ловиньтан кол ты урыл тāра-патты, олн винэ нэпаканыл тāра лап-панталаве. Ты сака тāр-витың вāрмаль. Ань тох ул вос ёмты, рўпата минэ хōтпан сака ёмашакв номсахтуңкве ёри, мўсхал щирыл рўпитаңкве ёри».

2016 тал мāнь таквс ётпосэ пāsныл урккың кўщаит сака тākыш пащралаңкве патвёсыт. Ст. 5. 27 КоАП щирыл рўпитам хōтпан олн ат те ойтёгыт, яныг штрафыл пинавет. Њс аквта 2016 тал пāsныл Трудовой кодекс кит сākконагёт – ст. 136 ос 236 хансым оллы, ань рўпата олн кāсың ётпос охса вос ойтаве, 15 хōтал мины, хōтпа олныл вос миве.

Юи-ъвыл лāтың Татьяна Чекунова тав лāвыс: «Ювле хуль-тум тāлт рўпата мāt мощща хōтпа сакватахтас. Та ёлы-пал тāлытт маҳум вāтихал сакватахтālсыт, сāv хōтпа āтимыг ёмтыс. Ань маҳум рўпатанылт ўргалахтуңкве патсыт, техника безопасность ханищтаңкве патсыт. Туп таи ёт мāн ань ты хōтал мус воритотёв – тōва мāt маҳум рўпата олныл ойтункве шар ат таңхавет, лāпалāлавет. Ты торыг мāн элаль рўпитёв, маҳманувн нётункве патёв».

**Светлана
МАТВЕЕВА**

ЛЯХХАЛЫТ

Мирн нётнэ колыт уральтавет



С. Кононенко

Ханты-Мансийск үст мирн нётнэ департаментыт сапрани олыс, тот Общественный советыт олнэ махум акван-атхатыгласыт. Ты советыт рүпитан хотпат департамент эт савсыр организацият уральтэгыт ос сав мот эрнэ рүпата вэрэгыт.

Та тал сыв манхурип мирн нётнэ колыт уральтавэсыт, та урыл өвлэт махум потыртасыт. 2016 тал сыв тан Ханты-Мансийский районтолнэ «Уют» яныгпала хотпат үргалан кол

ос Кондинский районт «Фортуна» мир нётнэ кол уральтаңкве ялсыт. Тувыл това рүпата тот люльсан вэрвес, нэпакыт ёмашакв ат щёпитавэсыт, савсыр договор-нэпакыт мори хасвэсыт. Тан тув ялма-ныл юи-палт ты рүпата ань мұсхалыг тот вара-ве. Ты талт тан мирн нётнэ мот организацият уральтаңкве тах ялэгыт.

Та юи-палт ты советыт кұщаиг олнэ хум Станислав Кононенко латың лавыс. Ты тал сыв манхурип рүпата

варуңкве патэгыт, ос та урыл потыртас. Ань агмың-мосың махум нётнэ магсыл «Доступная среда» наппа программа рүпиты. Ты хосыт сака сав олн холтаве кос. Ос тувыл ань тыг мус агмың-мосың хотпат эрнэ щирыл аты нётает. Ты программа элал хумус рүпиты ос олныт хоталь холтавет, советыт рүпитан махум акваг уральтаңкве тах патыяныл.

Людмила
ТЕТКИНА

Нёлм рүтанув палт мүйлуңкве ялэн

Ань Венгриян ялнэ магсыл Авиза-нэпакыт варауңкве тыт Ханты-Мансийск үст рөви. Ты урыл потыртаңкве РИЦ «Югра» колн венгр хум Георгий Явоч ёхталас, тав «Robinson Tours» кұщаиг рүпиты. Ты элы-пал мот ұсытт туп рөвыс тамле нэпакыт варауңкве.

Георгий Явоч лавыс, ман округв эт рүпитаңкве тан хосат тагыл тахсыт. Ань матъёмас тамле вэрмал элал тах паты. Округувт венгрыт тан рүт махманыл олэгыт, ты хантыт ос ман, маньшит. Ман латтанувт аквхурип латңыт олэгыт: «пуңк», «кат», «телп», «сам» ос мотаныт.

Георгий лавыс: «Венгрия Россия эт юртыңыщ олы, мот хон мат халт Венгрия ос Россия акван-нётхатым, акван-юрщхатым рүпитэг. Ман таңхөв, тыт Юграт олнэ махум ман палтув ұшлахтуңкве, мүйлуңкве вос ёхталэгыт. Ман ұсанувт сав ұшлахтын мат олэгыт, витаныл нэмхуньт ат полиглан тұрытыт пувлуңкве рөви.

Савсыр тәнүт ман палтув тыналаве, винат

варавет. Туи-тэлы мүйлуңкве ёхталэн. Акв порат ты вэрмал эл-пөилттэлавес, ань ман нан ётын элал рүпитаңкве таңхөв. Будапешт ұсув — сака нётнэ, ёмас ұс, тав Европат ос мир янытыл сака нётнэг ловиньтахты.

Венгр хум эт ты ляххал урыл потыртаңкве ос хұрум нэ ёхталасыт. Елена Лебедева Москва үст «Pony Express» визат вэрнэ мат рүпиты, тав лавыс, Россия янытыл 61 мат Венгриян виза-нэпакыт варауңкве рөви. Ань Ханты-Мансийск ляпат олнэ ұсытныл ос павлытныл махум тыг ёхталаңкве вэрмэгыт ос нэпаканыл тыт тах вэрэгыт.

Юлия Дедюхина Екатеринбург үст визат вэрнэ мат рүпиты. Тав лавыс, Венгриян сав



И. Арканова, Г. Явоч, Е. Лебедева

вынпалэ махум пусмалтахтын путевкат ёвтэгыт. Ханты-Мансийск ұсныл тув ялнэ ос сат хотал ұшлахтын магсыл акв хотпан 45 сөтыра солкөви ойтуңкве эри. Ос хотпа пусмалтахтын путевка те выг, тонт 65 сөтыра солкөви савит тынэ. Виза нэпаканэ вэрнэ магсыл 35 евро ойтуңкве эри, осты коньпал сервисный сбory лавнэ ут магсыл 30 евро ойтаве. Ты олныт нэпакыт пуссын Екатеринбург ұсн ос ювле тетыглан магсыл холтавет.

Инна Арканова мавит ос несырьевой сектор экономика департаментыт рүпиты, нэ лавыс: «Ман ос венгр махум тыг мүйлуңкве вөвиянув, маньшит ос хантыт ялпың хоталыт сунсуңкве вос ёхталэгыт, тыт салың махманув салыл касуңкве патэгыт, Уринэква хотал тах вэрыглаве ос савсыр касылыт олыг-лэгыт, вос ёхталэгыт, ман палтув тананылн пұмыщ паты».

Галина
КОНДИНА

Пустāгыл ӧлуңкве та ханищтавёв

Мāн округувт ты тāl мāхум пустāгыл ӧлнэ тāлыг намаявес. Ты кастыл сāvсыр рӯпата вāруңкве ань ӧвылтавет. Ос ты элы-пāлт яныг программа-нэпак хасвес, кāсың элумхōлас такви номтэ кетуңкве тув вёрмыс.

2017 тāl сыс манху- рип рӯпата вāруңкве патаве, та урыл кӯщайт потыртасыт. Мир пусмалтан департаментыт кӯщай Алексей Добровольский, Ханты-Мансийск үст ӧлнэ округ пӯльница кӯщай нэ Елена Кутефа, мир пусмалтан центрыт кӯщай Алексей Молостов ос лёккарыт ханищтан академият рӯпитан нэ Тамара Овечкина ляххал тотнэ мāхум ёт хонтхатыгласыт.

Алексей Добровольский лāвыс: «Тамле эрнэ тēла мāн таимāгсыл вāруңкве ӧвылтасув, округ мирув пустāгыл

ӧлнэ урыл акваг вос номсэгыт ос вāтихал пӯльницан лёккар палт вос ялантэгыт. Агмыл ул вос ёмтсыт, хумус ургалахтым элаль ӧлуңкве, та урыл вāтихал потыртаңкветахпатэв».

Мир пусмалтан центрыт кӯщай рӯпитан хум Алексей Молостов ос тох лāвыс: «Мāн яныг план-нэпак хасмув порат, тыт ӧлнэ мир кетум лātҗаныл ос ёмашакв ловиньтасанув. Ты тāl сыс сāvсыр ялпың хоталыт вāрыглаңкве, касыл щёпитаңкве тах патэв. Тамле тēлат вāрыглан порат мāхум акваг тах

потыртаңкве патавет, вина ул вос аёгыт, хохса ул вос хартэгыт ос туп ёмас тәнут вос тэгыт, тонт пустāгыл ӧлуңкве тах патэгыт».

Округ пӯльницат рӯпитан кӯщай нэ Елена Кутефа ос лāтың лāвыс: «2010 тāl пāsныл мāн пӯльницавт акв центр рӯпиты. Тув кāсың хотпа ёхталаңкве вёрми ос янытэт уральтаве. Ювле хультум тāлт тув хӯрум сōтыра арыгкем элумхōлас ёхталас. Мāхум акваг рӯпитым ос акваг хотталь молямлым, тāнки уранылт щар ат номсэгыт ос пӯльницан туп тонт минэгыт, хунь агмыл ёмтэгыт. Ты центр-колт элумхōлас ёмашакв уральтаве - кёлпе виве, сāvсыр мот анализыл вāраве ос сыме уральтаве. Ос хотпа агме тара

ке хонтаве, тонт тав моляхнув пусми».

Лёккар нэ лавыс, ты центрын ёхталан мир халт сāv хотпат сака нёвлиң-тэпыңыт, хот-вōитымат ос тый мāгсыл кёлпаныл лӯлиг ёмты, симаныл лӯльсаң рӯпиты. Манхурип тәнут тэңкве ос хумус пустāгыл ӧлуңкве эри, тот тән потыртавет.

Лёккарыт ханищтан колт рӯпитан нэ Тамара Овечкина ос лāвыс: «Ты элы-пāлт лёккарыт ат тāl сыс акв щёс ханищтавёсыт. Ань ты рӯпата мот щирыл вāраве. Ты пора сыс тән акваг ханищтавет ос сāvсыр семинарытын, конференциятын кётыглавет. Тув ялантан мāгсыл тән ат тāl сыс 250 баллыл хансавет».

Людмила ТЕТКИНА

Үйхул янмалтан хотпат олныл таставет

Сāvсыр үйхул ос тэпкант тәнут Сянмалтан хотпат ты этпос ӧвылтахтам порат Ханты-Мансийск үсн сапрāни вōвыглавёсыт. Тāн Москва үсныл ёхталам яныг кӯщай Владимир Свеженец ёт хонтхатыгласыт. Ты хум сельский хозяйства Министерстват рӯпиты.

Владимир Павлович акв йильпи тēла урыл потыртас. Үйхул ос сāvсыр тәнут янмалтан мāхум олныл нётает, тән субсидия-олныл, грант-олныл тастыглавет. Ань ты олныт йильпи щирыл уртуңкве тах патавет. Кӯщай лāвыс: «Ты элы-пāлт ты субсидия-олныт мāн мāнки Россия янытыл үйхул ос тэпкант тәнут янмалтан хотпат халт уртсанув. 2017 тālныл Россия ӧлнэ мāv янытыл рӯпитан мирко-

лыт тāнки ты рӯпата тах вāрегыт. Үйхул янмалтан хоты фермат, кооперативыт олныл нётуңкве эрэгыт, нāн ёмшаквнув вāглың».

Ты тāлт мāн округ Россия бюджетныл 16,5 млн. солкōвил тах миве. Мирколт рӯпитан кӯщайт тāнки мāхум халт уртуңкве патыяныл. Ты хӯрум арыгкем млн. солкōвил фермат ос кооперативыт мивет.

Хум элаль лāвыс: «Ты олныл мāхум касыл щирыл мивет. Хоты

хотпат нэпаканыл кётыяныл ос тāнки рӯпатаныл урыл ёмашакв ке потыртэгыт, тән та нётает. Тувыл тән хумус рӯпитэгыт, манхурип үйхул манос тәнут янмалтэгыт, ёмашакв уральтән ос туп ты юипāлт олныл нётән.

Ань Россият сāv фермат, хозяйстват акван-тотавет ос кооперативыг вāравет. Үйхул янмалтан мāхумн аквёт кӯпнитнув рӯпитаңкве тах паты. Тыщирыл тән мис, пӯрыщ, щипкурёк нёвыль, щаквит, мӯңит ос мот тәнутаныл тāнки элаль тыналыяныл.

Нāн ӧлнэ мāнт ӧс тамле кооперативыт вāруңкве ань эри. Тот рӯпитан мāхум 70 млн. солкōвил тракторыт ос

сāv мот техника ёвтнэ мāгсыл мивет».

Округ кӯщай вāңын хум Алексей Забозлаев ос ты рӯпата урыл лāвыс: «Үйхул ос сāvсыр тәнут янмалтан мāхум мāн нётыянув ос олныл тастыглыянув. Тән пуссын округ янытыл рӯпитэгыт. Ос хумус тāнаныл акван-тотуңкве, мāн ань номсахтуңкве тах патэв».

Ты сапрāни юи-пāлт кӯщай хум хул янмалтан завод сунсуңкве ялыс. Ос тувыл Ханты-Мансийский район Яр-ки пāвылн тотыглавет. Та пāвылт мāхум теплицат сāvсыр тәнут тālэ-тувёт янмалтэгыт.

Людмила
ТЕТКИНА

КЎЩАЙТ РҰПАТАНЫЛ

Мә-витув ёмашакв ўргалаве

Хус тәл ювле хультум порат Белоярский район кўщай хум Сергей Маненков округ мирколн пицма хансыс. Округ яныг кўщайт вѳвсанэ, тән районанылт Нумто нампа яныг тўр ўргалаңкв вос патаве ос «природный паркыг» вос вѳраве.

Ань ты урыл Евгений Платонов лѳххал тотнэ мѳхумн потыртас. Ос элаль тав лѳвыс, мѳтыт этпост 23 хѳталэт ты ёмас тѳла кастыл конференция вѳраве. Тув учѳный мѳхум, мѳвит ўргалан хѳтпат, ха-

ништахтын мѳхум тах вѳвавет. Тән ты ялпың тўр урыл потыртаңкв патѳгыт.

Ань та ѳрт 220 соссаң хѳтпат ѳлѳгыт, ты ѳрныт ос хантыт. Тән халанылт сѳвыңпѳлэ пуссын сѳлы ѳныщѳгыт, та тўр ляпат

сѳлы ўрим яласѳгыт. Ты кўщай лѳвыс, мѳн округувт туп хўрум тамле сыстам ос ёмас мѳ ѳлы. Тән мирн сака ат новавет — ты мѳн Нѳранув, Нумто тўр ос Корлики пѳвыл. Ты пѳвыл Нижневартковский районт ѳлы.

Ань элаль тѳнаныл ёмашакв ўргалаңкв ѳри. Нумто тўр ляпат «Красная книга» нѳпакн хансым сѳв товлың ўй ѳлы, сѳвсыр лўпатат яныгмѳгыт. Та

мѳн ань пѳх хѳтпат сака ат ѳхталѳгыт.

Ос Нефтеюганский районт сытам вѳрт хѳт улыпан ур хѳнтвес. Тот сака яныг, осың ос сѳв тѳлпа улыпат лўлѳгыт. Вѳре сака сыстам. Ань округ мирколт нѳпакыт щѳпитавет, та мѳ ѳс «природный паркыг» вос хансавет. Ты вѳрщахыл мѳ-вѳй нѳх-винэ мѳт хѳнтвес. Ос нефтяник-мѳхум вори шар ат тотѳгыт, лѳвѳгыт, матыр вѳруңкв ман нѳгункв те ѳри, тән тах ты рўпата пуссын вѳрияныл.

Валентина ВАСИЛЬЕВА

Округ кўщай вѳрум рўпататэ урыл тән потыртасыт

Кўщай нѳ Наталья Комарова мѳлты кѳтѳл сыс округувт ѳлупсав ѳвылтыт, кол ўнттын вѳрмалит урыл, мѳхум пусмалтан, сѳвсыр нѳтмилыт вѳрнэ урыл ѳтчѳт-лѳтың ловиньтас. Ань ветераныт ос правоохранительный органыт тѳланыл ѳт рўпитан кўщай нѳ Надежда Кумирова, экономический наука доктор нам ѳщнэ экономист-хѳтпа Владимир Куриков, Ханты-Мансийск ўс почѳтный нам ѳщнэ хум Николай Бондырев, пўльницат мѳхум сѳңквѳхвтасаныл пусмалтан-лѳккар нѳ Оксана Пьянкина лѳххал тотнэ мѳхум ѳт хѳнтхатыгласыт. Ос губернатор мѳлты тѳл сыс вѳрум рўпататэ ѳвылтыт потыртасыт.

Ты мўй хѳтпат лѳвсыт, округувт сѳвыңпѳлэ тѳлат пуссын ѳмщакв вѳрвѳсыт. Тән вѳганыл, манасѳвит олн хоталь холтвес, маныр тѳлат вѳруңкве ѳлымавѳсыт, ос хоты тѳлат мѳгыс элаль номсахтункве ѳри. 2017 тѳлт сѳв ѳлнэ колыт ўнттункве ѳрѳгыт, нуса хѳтпат олн-нѳтмилыл ѳс вос мивет.

Ань кѳсың мўй хѳтпа такви рўпататѳт ѳлнэ вѳрмалит урыл потыр-тас. Владимир Куриков лѳвыс: «Мѳн округув экономика тѳланэ мѳ-кыг элаль

тотавет. Округувт мѳ-вѳй нѳх-винэ нила йильпи мѳт нефтяникыт рўпитаңкве патсыт, сѳт тамле мѳ иң щѳпитавет. Ат тѳл сыс мѳн 3,87 триллион солкѳви сѳлсўв, тасѳвит мѳ-вѳй мѳ ѳлы-пѳлныл нѳх та висўв ос мѳт сѳв-сыр ут вѳрсўв. Мѳлты тѳлт Юграт промышленный политика мѳгыс йильпи сѳккон пирмайтавес, промышленный Фонд вѳрвес».

Надежда Кумирова тох потыртас: «Ам ань лѳвѳгум, сѳлым олныт мѳхумн нѳтмил вѳрнэ

мѳгыс мивет. Ань округувт ветераныт акван-атхатыглан организацият ѳныщѳгыт, тув 62 сѳтыра арыгкем хѳтпат ялантѳгыт. Мѳн пуссын ты организацият ѳт рўпитѳв ос ветеранытн нѳтѳв. Мѳлты мирн нѳтнэ департамент ѳт мѳн 2,7 сѳтыра хѳтпатныл нѳтмил киснэ нѳпакыт суссанўв ос ты мѳхум мѳгыс 34 млн. сѳвит солкѳви тастысўв».

Тувыл Николай Бондарев потыртас. Тав лѳвыс, мѳхум пустагыл ос тѳксарыг ѳлнѳныл мѳгыс округув спорт тѳлат осн-паттым ѳныщавет. Ань мѳхум пуссын ГТО щирыл уральтаңкве патавет. Руш лѳтңыл ты тѳла «Готов к труду и обороне» лѳваве. Ты касылыт мѳкыг вѳрнэ мѳгыс элумхѳласн пустагыл ѳлуңкве ѳри, ви-нааюңкве,хохсахартункве ат ѳри, пуссын мѳт лўль пищит хот-оссувлѳнкве ѳрѳгыт.

Тувыл элумхѳлас тѳланэ щирыл такви ГТО норма ѳныщи. Сѳтлов

тѳлныл яныгнув хѳтпат тѳнки касылыт касѳгыт. Мѳт ёмас вѳрмаль тамле — округ янытыл школат хаништахтын нѳврамыт шахматыл ѳнгын урокыл вѳрвѳсыт. Ты хосыт сѳв номтың ѳгиришит-пыгришит хѳнтавет.

Мир пусмалтан мѳгыс ѳс сѳв тѳлат вѳравет. Ань окружной пўльницан атпан мѳн-лат лѳккарыт рўпитаңкве ѳхтысыт. 2016 тѳл сыс 12 сѳтыра ѳгмың хѳтпат йильпи ищхйпың утыл ѳмщакв уральтавѳсыт. Лѳккарыт сыресыр хаштѳл ѳгмыт пусмалтаңкве ань хѳсѳгыт. Сѳңквѳхвтас ос сым ѳгмыт тѳра пусмалтыяныл. Элумхѳлас йильпи тѳрпил миве манос йильпи матыр шаңквыл ўнттаве, руш щирыл «трансплантацияг» лѳваве, тѳва хѳтпат тамле операция юи-пѳлт элаль пустагыл та ѳлѳгыт. Ань тамле пора ѳмтыс, мѳн ищхйпың ут тѳл ѳлуңкве ат вѳрмѳв.

Тамара МЕРОВА

Мирн вāнэ хум нъяврамыт ханищты

Тāl котиль этпос 17 хōталэт Александр Павлович Тасъманов 50 тālэ тōвлыс. Ты ханты хум Белоярский район Касум пāвылт олы. Мāнълат порат тав касуңкве акваг ялантас, сāлың сун ұлтта поргыс, тыньщан ос сāграп пāхвтыс. Тōнт тав ұщлахттал сāлың сун ұлтта 820 щёс порыгмас. Ты юи-пāлт «Рекорд Гиннеса» намба нēпакн хасвес.

Александр Павлович «Заслуженный деятель физической культуры и спорта ХМАО» нам оңыши. Тав хус щёс Россия чемпионыг ёмталас. Ханты хум 1994 тāлт Американ ос 1996 тāлт Канада мōт хōн мāн мирхал касылн ялыс. Ань тав Касум пāвылт нъяврамыт ханищтым рупиты. Ам ты ханты хум ёт хōнтхатыгласум, олупсатэ ос рупататэ урыл китыгласум.

—**Александр Павлович, хоты порат наң касуңкве овылтахтасын?**

— Ам 1983 тāлт школа āстламум юи-пāлт Салехард ұсн ұйхул пусмалтан лēккарыг ханищтахтуңкве минасум. Та ұст сāлың сун ұлтта поргуңкве, тыньщан пāхвтуңкве ос ёсал хāйтыгтаңкве патсум. 1983-1987 тāлыт тот ханищтахтым сāвсыр мāн касуңкве яланта-сум. Ам яныг пұма-

щипа лāтың Геннадий Владимирович Сысолятинын лāвёгум, тав мāн мāгсылув сāв эрнэ рупата вāрыс.

Тōнт Ямал мāt олнэ сāв мāнълат хōтпат спорт нупыл сунсуңкве патсыт. Тав ёрётыл сосаң мирыт мирхал касыл Америка ос Канада мōт хōн мāt вāрыглаңкве овылтавес. Ам тув ос кит щёс ялсум.

Валентин Никифорович Зуев ос сāв рупата ты касыл мāгсыл вāрыс. Ам ханищтахтамум порат тав Ямал мāt олыс. Ты юи-пāлт Тюмень ұсн вāнтлас. Та ұст ос спорт щирыл рупитас, сāвсыр касылт вāруңкве акваг нётис. Ты коньпал тав северный многоборье федерацият кұщаиг олыс. Сāвнув мāхум вос касыс, сāлың сун ұлтта вос поргысыт, тыньщан ос сāграп вос пāхвтысыт, тав ос сака сāв ёр пиныс.

Салехард ұст мēн Андрей Дорофеевич Филиппов ёт ханищтахтасмēн. Тав ань Хāльұс район Саранпāвылт нъяврамыт ёт рупиты. Овлэт тав а́нум ёсал хāйтункве, сосаң мāхум щирыл касуңкве ханищтастэ. Тōнт мēн сас Тюменский область командан хансым олсумēн, акваёт сāвсыр касылн ялантасмēн ос акваг нōх-патыгласмēн.

Ханищтахтын мāныл хунь āстысум, Касум пāвылн юв ёхтысум. Кит тāl арыгкем совхозт ветеринарыг рупитасум. Сāлы ўрнэ мāхум ёт акваг яласым номтумн ёхтыс, а́нум элаль спорт щирыл рупитаңкве эри. Ты юи-пāлт 1989 тāлт Ленинград ұсн А.И. Герцена намба университетын ханищтахтуңкве минасум.

Яныг ұст ам Илья Макаров румам ёт ханищтахтасмēн. Тав Ямал мāt Шурышкарский район Овгорт пāвылныл олы. Ань тав Тарко-Сале ұст олы ос нъяврамыт ёт рупиты. Ханищтахтын мāныл āстысум, юв пāвлумн ёхтысум, нъяврамыт ханищтаңкве патсум.

—**Ань наң тренерыг рупитэгын, манасāвит**

āги-пыг наң палтын яланты?

— Ам палтум 11-18 тāl яныт нъяврамыт ёхталэгыт. Пуссын акваёт 50 нъяврам. Тāн ётаныл мāн кон-хāйтыгтэв ос сāграп пāхвтэв, тыньщан репыгтэв. Спортзал-колнакт сāлың сун ұлтта поргуңкве ханищтыанум. Ты элы-пāлт сāв āгит-пыгыт ам палтум ханищтахтуңкве ялантасыт.

Ань тāн интернетыт акваг ёнгим савыңыг ёмтэгыт, нēматыр вāруңкве ат таңхегыт. Мāн яныгмамув порат тамле ёнгын ут āтим олыс, улпыл, таимāгсыл акваг кон хāйтыгтасу́в, ёнгасасу́в ос эрнэ тэла урыл пұмщалахтасу́в. Ань тасāвит ёмас каснэ колыт ўнттавет, сāвсыр эрнэ пормасыт ёвтает. Тāн тув ялантаңкве ат кāsашегыт, хōтал палыт юн компьютер нупыл сунсым ўнлантэгыт.

Матъёмас, тамле касылын нъяврамыт округ янытыл ханищтавет. Ань ёмас тренер-хōтпат Хāльұс район Саранпāвылт, Нефтеюганский район Пойковский пāвылт, Сургутский район Солнечный пāвылт ос Нижневартовский рай-





он Варьёган павылт рүпитэгыт. Тый магсыл тән Россия касылытын ялантым акваг нөх-патэгыт.

Ам акваг 1990 тал номылматалэгум, тонт Россия янытыл олнэ соссаң мирыт Таймырский округ Дудинка үсн касуңкве акван-атхатыгласыт. Мән ос тув вөвыгла-весүв. Тонт туп ман, Касум павылт олнэ спортсменыт, тув ми-насүв. Россия янытыл олнэ махум халт общекомандный зачё-тыт мән овыл места висүв. Мән акв мән павылт олнэ хотпат тот янытлавесүв.

Юрий Тарлин тын-щаң пахвтуңкве сака ёмашакв хасы. Тот тав 222 щёс тынщаң репыгтәлыс. Лүимат яныгман махум сака ёрыг олэгыт, тән сав щёс сәлың сун ұлтта поргуңкве ос сав щёс тынщаң репыгтаңкве вөрмөгыт.

Аквта порат Олег Почипинский мән ётув тув ялыс, тав саграп ос 218 метра палытын вушкасастә. 1995 тал мус ты рекордыт Касум павылт олнэ хум нупыл хансым олсыт

Ань хаништан ағия-нум-пыгиянум халт ос сав ёр няврам олы. Денис Иногородский ам палтум сав тал хаништахтуңкве ялан-тас. Пыг Белоярский үст олы. Тав ос сәлың сун ұлтта поргуңкве сака хасы. Михаил Игишев «Абсолютный чемпион России по северному многоборью» нам оныщи. Тав 2016 талт Красноярск үст нөх-патыс.

Ты элы-палт вортур этпос 19-23 хоталыт Сыктывкар үст олыг-лам касылт ос овыл места вис. Та тал ойг-пам элы-палт яныг таквс этпос Ямал мат Новый Уренгой үст тав ос нөх-патыс.

— **Ань яныгман ағит-пыгыт савсыр ищхипың утыл ёнгим, касуңкве хаништахтуңкве ат кәсашәгыт. Тән тув ялантанёныл магсыл манхурип рүпата вәруңкве эри?**

— Няврам сәлың сун ұлтта поргуңкве, тынщаң пахвтуңкве, хайтыгтаңкве ат ке вөрми, тав тув ёхта-лаңкве ат паты. Мотанэ молях ке хайтыгыт, сәлың сун ұлтта ёма-

шакв порыгми, тавән пұмаш паты, касуңкве хаништахтуңкве тах кәсашы.

Ань Сургутский районт няврамыт ёт Григорий Николаевич Рябий рүпиты. Тав молдаван хум, мәнлат порат мот спортсме-ныт халт сака ёмашакв касыс. Ты тал 60 талэ товлы. Тав мот мәныл ёхтум хум кос ос соссаң махум холыт касуңкве патыс, сав тал ағит-пыгыт ханишты. Тав нявраманэ савсыр ка-сылт акваг нөх-па-тэгыт.

Нефтеюганский районт хатань хум Ра-мыс Абукиров рүпи-ты. Тав ос няврамыт ёмашакв хаништыянэ, округувт ос Россият вә-рыглан касылт акваг овыл места вуйлэгыт. Тав палтэ ялантан пыг Максим Нигаматул-лин ань чемпионыг олы. Ты тренер-хотпан ос яныг пұмашипа лә-тың ләвуңкве эри.

Това порат касылн ялантан магсыл ол-ныл ат тастыглавөг, тәнки машинал ағия-нән-пыганән касуң-кве тотыянән. Тув мус рүпататән ос нявра-манән та эруптыянән.

Молты тал мән таквс этпос Сургутский районт олум касылн ам туп хұрум ағи то-тыгласум, олныл ос ат майвёсум. Мән Бе-лоярский үсныл Сур-гут үс мус товлыңха-пылтыламласүв, билет сака тының олыс.

Ос тувыл ати кәсың хотпа тренерыг рүпи-таңкве вөрми. Ань сав мәнлат хотпат «мас-тер спорта» ос мот сав нам оныщөгыт, тувыл няврамыт ёт рүпитаң-кве ат вөрмөгыт, ат хасәгыт. Тый магсыл това порат номсәгум, рупатал пөхын ке ми-нәгум, Касум павылт олнэ ағит-пыгыт хотью-тын хаништаңкве па-тавет.

— **Александр Павло-вич, ань хоты районт шар ёр команда олы?**

— Молты тал сыс ва-рыглым касылт 11-18 тал яныт няврамыт халт Нефтеюганский, Сургутский ос Хальүс районыт олнэ ағит-пыгыт шар ёрыг олсыт. Ты элы-палт сав тал сыс Белоярский районт олнэ команда акваг овыл места вуйлас.

**Людмила
ТЕТКИНА**

ХУМ ХӨТПАТ ЯНЫТЛАН ХӨТАЛ КАСТЫЛ

Хүрүм мәһһи пьг лусьтасьт

Рётың юсвой этпос ват нупыл хурмит хоталэт Россия янытыл армият лусьтан хотпат ос хум махум ялпың хоталаныл олы. Ты кастыл ам Сергей Хозумов, маһһи хум, ёт потрамасум. Тав Хальёс район Саранпавылт самың патьс. Тот яныгмас, школа аһтлас. Тувыл армиян вуйвес. Олпусатэ хумлег олы, һан тав потре элалы ловиньтэн.

«Ам армия юи-палт Ханты-Мансийск үсн ёхтысум. Тыт колледжит маһинат щёпитан хотпаг ханищтахтасум. Аквматнакт Ас-угорский театрын ялсум. Тот маһһи ос ханты маһһлат агит-пыгыт рупитаңкве атвёсыт.

Ам ос тув ёхтысум, кущай ёт потрамасум. Тав аһум сосаң мир олнэ-хулнэ нак, щань латың урыл китыглас-тэ. Ам тавён омагум-аһагум олупса урыл потьртасум. Тувыл кит хотал миһас ос рупитаңкве та воввёсум. Овлэт кастал рупитасум. Ётыл лащал-лащал ханьщувласум, аһ ты рупатам сака эрупты-

лум, хурмит талыг ты ёмты, тот рупитанэм.

Тот саңквылтапыл саңквылтаңкве ос йиквуңкве ханищтавеһ. Аһ това таһыт ваганум, мощ ёнгёгум. Ты элы-палт школат ханищтахтынэм порат Саранпавыл ёнгын колн Дмитрий Агеев палт хурмахеһ этпос ялантасум. Та юи-палт ос товтыл хайтнэ касылын миһасум. Аһ номсёгум, ёнгын колныл наскас-сыг пёхын миһасум. Тонт ханищтахтасум ке, аһ саңквылтапыл саңквылтаңкве ос йиквуңкве ёмас хаснувум.

Маһиһ олмум порат кустырнувег саңквылтаңкве ханищтахтасум.

Аһ яһгыгнув ёмтсум, ханищтахтуңкве тарвитыңнув. Ты ати, това таһыт мощ номи-яһум. Театрувт юи-овыл щёс акваг спектаклит суссылтёв. Йиквнэ колувт пуссын аквёет хусахеһ аги-пыг рупиты. Маһманув пуссын ёмасыт, халувт юртыңыщ олёв, нётхатёв.

Ты талыт сыс сав маһ йиквуңкве тотыглаве-сёв. Молты тал такв-сы порат Финляндия маһ рут мирув палт муйлысёв. Россият ос Красноярск үсн ялсёв. Округув тай ос яһытёт яласаслёв. Аһ рётың юсвой этпост ос Октябрьский районнын минёв. Октябрьское, Андра, Приобье, Талинка, пуссын аквёет саһахеһ павлытыт туйлапыт суссылтёв тах.

Овыл щёс туй порат наһиңхапыл тув муйлуңкве ялсёв. Павлың мирн спектаклянув сака мустысыт, таимағыс таһ маһ

палтув свонитасыт ос муйлуңкве воввёсёв. Ам рупитаңкве хуһ ёхтысум, овлёт тал охса наһ ханищтахтасум. Тувыл акв спектаклит арталахтын мағыс ёнгысум ос рупитаңкве тув та вуйвёсум.

Ам омагум-аһагум сас маһһи хотпаг. Омаһнаме Тамара Гындыбина, такви опарищ наме Хозумова, тав совхозт сав тал пуркат ос мот савсыр масну-тыт юнтым рупиты. Ты тал атпан талэ товлы, пенсиян патхаты тах. Аһам Пётр Гындыбин, тав хотахеһ тал пенсият олы. Тав ос сав тал Саранпавыл совхозт рупитас.

Сартын тав салыңколт яласас. Котиль аһшим Иван хуһ овыл классын миһас, тав салыңколт рупитаңкве пойтыс, налув вағыс. Тав нилыт бригадат салы урим яласас. Аһ Саранпавыл совхозт нила бригада салы урим хулытыс. Ты ки-



Иван



Алексей



Сергей экватэ ёт



Хурум пыг ёсал хайтсыт



Иван армият пöслүвес

тыт, нилыт, хōтыт ос нёлоловит бригадат махум рүпитэгыт.

Тан лāвнēныл ши-рыл, нилыт бригадат оцнэ сāлыт нёвляныл мōт сāлыт халт вōиң-нувег олэгыт, китыт бригадат ос щар сāv сāлы оныщаве. Тамле ты вāрмалы олы. Сārтын сāvнув бригада олыс, лāщал-лāщал сāлыт холуңкве патсыт, ёты-ōвылт мощца сāлы хулытум бриагадат пус-сын лап-пантвёсыт, сāлыт ос акван-тот-вёсыт. Нила яныг бригада вāрвес.

2010 тāлт ам армиян вуйвёсум. Москва ўс ляпат Пушкинский районт Софрина пā-вылт акв тāl лусытасум. Лусытаңкве āнумн сака ёмас олыс. Таимāгыс

тāлум оигпам юи-пāлт тот хулытумкве ёмталасум, тувыл ома-гум-āтягум ос рўта-нумн ат тāртвёсум, юв вōввёсум.

Тот хулытумкве ос таимāгыс номтум пат-тыс, лусытамум порат аквматнакт Дагестан мāн тотыглавесўв. Кавказ мātэ ос нёрың, та нётнэ мā сымумн татем хōяс, элаль тот лусытаңкве ёмталасум. Ос рўтанум ёт потра-мамум юи-пāлт юв минасум.

Щёмъявт мāн нила нйврам яныгмасўв. Хурум пыг, акв āги. Апциягум ос армиян ялсыг. Котиль āпщим наме Иван, тав Ново-сибирск ўс морской пехотат лусытас. Ос акв тāлн ялыс. 2013

тāлт юв ёхтыс. Тавēн ос армият сака ёмас олыс. Юв ёхтыс, өвлэт колледжит катерыл яла-саңкве ханищтахтас. Астластэ, ань ос хўр-мит тāl Югорский уни-верситетыт филологыт элаль ханищтахты.

Мāнь āпщимēн Алек-сей 2015 тāлт армия-ныл юв ёхтыс. Тав ос ам хольтум внутренние войска мāt Нижний Новгород ўс пōхыт лусытас. Сāvсыр мāн командировкан вā-тихал кётыглавес. Та-вēн лусытаңкве ос сака пūмаш олыс. Тав ань ос колледжит ин-женер-строитель хōт-паг ханищтахты. Ты тāl āстлан щирыл олы, ань элаль ос хōт ханищ-тахтумкве паты, ты урыл номсахты.

Щар мāнь ййгри-щув Елена, тав ты тāl Саранпāвылт школа āстлы. Ос тыг ханищ-тахтумкве ёхты тах. Мāн таве Югорский университетыт ханищ-таңкве вōвилўв. Тав ос лёккарыг ханищ-тахтумкве номсы. Хо-таль номтэ паты, тув та мины.

Мāн хунь юн олыглэв, пуссын мāньщи лātңыл потыртэв. Хунь мōр-сың порат потыртэгын, лāтың ёрувлахты. Иван ос Алексей мāньщи лā-тың ёмщакв торгамтэг кос, ос мощца потыртэг.

Елена тай щāнь лāтың ёмщакв вāг. Тав школат олимпиадат ос сāvсыр конкурсыт олыглан по-рат акваг мāньщи лāt-ңыл потрыт тув хансы.

Тыт олнэм сыс Са-ранпāвылн акваг хар-тавем. Туи порат ўщ-лахтумкве юв ёхталэв. Тāра Хōрыңпāвылн ми-нэв. Тот вōраев, хўл алыщлэв. Тот пёс колув ўнлы. Омам та колт ты яныгмас. Тувыл Ана-толий сасгум олмёт тот йильпи кол ўнттыс. Пāвылн ёхталанэв по-рат тот олэв».

Сергей ань Ханты-Мансийск ўст кол ёвтыс. Нэ тотыс, экватэ мāньщи āги, наме Анастасия, тав Лōпмус пāвылныл олы.


Ань юи-ōвыл тāлыт тōва мāньлат хōтпат лāвёгыт, лусытан мāt нэматыр вāруңкве, нас-кāссыг тāлыт холтуңкв. Сергей ты мāньщи пыгытын лусытан урыл тамле лāтың кё-тыс: «Ам номсэгум, армиян кāсың пыгын ялуңкве эри. Тот нāн тākсар хōтпаг ёмтэгын, эрнэ номт выгын, писалил пātлуптаңкве ханищавēн, элаль ёмас хōтпаг олэгын тах. Пи-луңкве ат эри, тот нэ-матыр люль вāрмалы ат ёмты. Ам лусытан махум пуссын янытлыянум, пустāгыл олэн».

Николай МЕРОВ




Тамара оманыл

Түрүпъят алыщлан хумыт



Иван Дима пьге ёт пöслым öлэг



Пыгыгвöрт ёмыгтэг

Мöлтý тåл оигпан ляпат Ханты-Мансийск үсн сåв пåлыл мåхум тыналахтуңкве ёхталасыт. Кåсың тåнти вårнэ тэнутаныл, маснутаныл тыналаңкве яныг үсн тотыгласыт. Тån халанылт акв мåныщи хум öлыс, ам тав ётэ потыртасум, ты Иван Качанов. Иван Митрофанович Саранпåвылт öлы, такви общинатэ урыл åнумн потыртас.

— Ам Хåльүс район-ныл Саранпåвылныл тыг нёхс, охсар, лэ-ңын совыт тыналаңкве тотсум. Мån «Тү-рупъя» общинав 2000 тåл пåсныл рүпиты, ань хөтхуйплов тåлэ төвлыс. Ам председа-телиг öлэгум. Общи-наmt налыман нупыл акв хөтпа договор щи-рыл рүпитэгыт. Ам тåнанылныл охсар, нё-хыс, лэңыт совыт пир-

майтэгум. Тåлы порат хўл пирмайтэгум.

— **Хўланын ос ўй сованын хоталь тоты-нын? Хоталь элаль тыналынын?**

— Хўланув мån Ека-теринбург үсн тына-лынынүв, тувыл мåшина ёхталы, тув тотавет. Нёхс совыт мöлтý ам Моск-ва үсн тетсанум, тот ёвтвёсыт. Ты тåл нёхсыт тыт Ханты-Мансийс-кыт пуссын ёвтавет.

— **Ос хўл мансåвит тонна пирмайтэгын?**

— Мån округ пåлыл квотал уртавёв, тувыл мансåвит тårтаве, та-сåвит пирмайтэв. Ый совыт ос лимит щирыл пирмайтåңкве тårта-вёв, тувыл сåв ат вы-гўв. Пирмайтам сова-нум öс амти элаль ёвтнэ хөтпа хөнтэгум. Кво-тал манос лимитыл мån тåлы сыс мивёв. Кåсың порат сåвсыр щирыл öлыглы. Ань 2016-2017 тåлыгн м�наван рёви ат-сåt нёхс, сåt янгуй, лов пупåпщикве кåтын-пат-туңкве. Ос алыщлан хөт-панум норма щирыл рүпитэгыт, акв элумхө-ласн ёри лов охсар, лов норка ос хўрумсåt лэ-ңын кåтын-паттуңкве.

— **Совыт, хўлыт ман-сåвит тыныл ёвтýя-нын?**

— Нёхс öс сåвсыр öлы, акв сов тит сөтыраныл ат сөтыра с�вит тынэ рёви вårуңкве, пунэ манхурипа, сов манпа-лыт пуссын сунсуңкве эри. Охсар сов акв сө-тыра атсåt солкөвиныл ос тит сөтыра с�вит тынэ.

Хулюмхўл акв тила — нёлоловхуйплов солко-ви, кåсэв — титхуйплов солкөви, сорт — налыман солкөви, сорх — атпан солкөви. Пил ты тåл ат пирмайтасўв, пиннэ мå ат төвылхаты. Хунь пилныл мөт тэнут вå-руңкве патэв, тонт тах пирмайтэв.

— **Округ пåлыл ол-ныл нётавён? Пушнина пирмайтан мåгсыл суб-сидия-олныл майлавён?**

— Мån дотация-ол-ныл мивёв. Öвлэт ам амти олныл мåхманум-ныл совыт, хўлыт ёвтэ-гум. Ётыл дотация-ол-ныл ущ мивёв.

— **Ос хотыл тасåвит олн виңкве? Алыщлан м�хманын öс олн ой-туңкве эри?**

— Ам яныг ўсытныл ёвтнэ мåхум ёт потыр-тахтэгум, тån ам ётум ойтхатэгыт, ам та ол-



Иван пўрлахтын мån ялыс

нытыл алышлан м̄х-манумныл ёвтэгум.

— **Тох рупитым наңти общинан м̄агсыл матыр олн с̄лыглэгын ман а̄ти?**

— Торың н̄матыр ат с̄лыглэгум, алышлан х̄отпанумн ойт̄эгум, тувыл аквты н̄алок ойт̄уңкве эри. Таим̄агыс ан̄ номс̄эгум, пилныл с̄авсыр т̄энут в̄аруңкве, ты в̄армалы руш л̄атңыл л̄ававе — «глубокая переработка».

— **Наң ан̄ тыт матырма т̄анкасовыт суссылтаңкве тотсын, ты манараның?**

— Ты м̄ан с̄уйпил-ныл, саңквлыпилныл, с̄авнил, т̄ахтпилныл, морахыл с̄авсыр джемыт, м̄аг, кисель, айн̄ вит в̄аруңкве таңх̄ев. Алтайн пилыт т̄етыглас̄ув, тот м̄ан ты суссылтан утытыл в̄арвес̄ув. Ан̄ м̄ан Ягрим п̄авылт м̄ан̄ завод ӯнттуңкве таңх̄ев, тот тамле т̄энут в̄арнуv̄ув. Ос хумус элалы рупитаңкве пат̄ев, ам̄ ан̄ ат в̄аглум. Ты урыл ётыл н̄анан потырт̄эгум.

Иван Митрофанович Ягрим п̄авылт самын патыс, т̄онт тав омаг̄е-а̄тыге х̄ул алышланкве Асн т̄етвесыг, таим̄агыс та п̄авылт самын патум хум. Ос с̄ат т̄ал мус с̄алың колт яныгмас, Саранп̄авылт школат хаништахтас. Тав а̄тыт̄е сака потрың, х̄отпа ну-пыл емас хум олыс.

Иван Светлана эква-т̄эн общинат̄е м̄агсыл н̄пакыт в̄аруңкве н̄таве, ан̄ йист с̄авсыр отч̄ёт-н̄пакыт акваг хансуңкве эри. Т̄ан щ̄емьял акван-н̄етхатым рупит̄эгыт. Пыгаг̄ен алышлым ялас̄эг, т̄ан т̄анти алышлан м̄а о̄ныщ̄егыт. Ты м̄аныщи щ̄емьян м̄ан пуста-гыл олн̄ л̄атың т̄ет̄ев, алышлан с̄от вос о̄ныщ̄егыт, номылматам т̄эланыл элалы вос в̄арианыл.

Галина КОНДИНА

Товтыл касн̄э в̄армалың щ̄епитахт̄эгыт

Ты т̄ал округувт касыл щирыл рупитан к̄ущаянув товтыл касн̄э в̄армалы ос щ̄епит̄эгыт. Тыим̄агсыл округ мирколт касыл элалы тотн̄э м̄ахум акван-атхатыгласыт.

Ан̄ ты т̄ал м̄ахум хумус товтыл касуңкве пат̄эгыт, л̄яххал тотн̄э х̄отпат элы-палт округ касыл департаментыт к̄ущаиг олн̄э хум Игорь Губкин, «ЮграМегаСпорт» касн̄э колт к̄ущай хум Валерий Радченко, Югорский колледж-интернатыт к̄ущаиг олн̄э хум Владимир Малышкин потыртасыт.

Округ о̄выл губернаторув Александр Филипенко намыл маим касн̄э стадионт м̄ахум к̄асың т̄ал Ханты-Мансийск ӯст товтыл х̄айт̄эгыт. Ты коныпал касн̄э хоталт ӯст «Готов к труду и обороне» намба фестивалы тах в̄араве. Ты касыл ӯсувт х̄урум янас м̄ат щ̄епитава — Югорский колледж-интернат п̄охат, теннисыл ёнгын кол элы-палт ос «Долина ручьёв» намба ворляпат.

Игорь Губкин л̄авыс, т̄ал сыс шар с̄ав мирыңыг ты касыл ты олыглы. Ты порат с̄ав мир товтыл касуңкве акван-атхатыгласыт. К̄асың т̄алныл с̄авнуv̄ув мир ёхты. М̄олты т̄ал х̄отхуйплов с̄отыра арыгтем х̄отпа касуңкве атхатыглас.

Ты т̄ал м̄ахум хасхатманыл щирыл, атхуйпловкем с̄отыра х̄отпа ёмты. Россия янытыл пуссын акв̄ёт с̄атлов м̄ат тамле касыл в̄арыглаве. М̄олты т̄ал

пуссын акв̄ёт нила-с̄аткем с̄отыра элум-х̄олас товтыл х̄айтуңкве ёхталасыт. Ты т̄ал округувт с̄ав муниципалитетыт товтыл касн̄э в̄армалы щ̄епит̄эгыт.

«Готов к труду и обороне» намба фестиваль округувт китыт т̄ал в̄арыглаве. Ты т̄ал н̄елоловхуйплов ӯст ос п̄авлыт мир касуңкве к̄асащасыт. К̄ущай хум л̄авыс, ты касыл хоты х̄отпа к̄аркамнуv̄ув х̄айты, т̄ан Россия янытыл юи-о̄вылт ёмт̄н̄э ты касылн̄ к̄етавет. Та касылыт м̄ан округувныл олн̄э х̄отпат в̄атихал н̄охпатыгласыт. Ан̄ м̄ан касн̄э х̄отпанув туп т̄элы порат кас̄эгыт. Тыгыл элалы туи порат ос касуңкве номс̄эгыт».

С̄артын с̄ав мир сакторыг товтыл х̄айт̄н̄э л̄ёңх ошчанувег олыс. Касыл о̄вылтахыт порат м̄ахум сака туйхатыс, марум олыс. М̄олты т̄ал туи порат та л̄ёңх ат метра арыгтемн̄ п̄ахвыңнуv̄ув в̄арвес. Ты т̄ал мирн̄ лошитнуv̄ув ёмты, халанылт сака ат торахт̄эгыт. Товтыл х̄айт̄н̄э х̄отал м̄алтыпнуv̄ув ёмт̄н̄э порат уш̄ в̄араве. Касыл алпыл аквхуйплов щ̄ест̄ ӯсувт олн̄э яныг стадионныл о̄вылтахты.

Овл̄ёт мир товтыл х̄айт̄н̄э л̄ёңхытт акв с̄отыра атс̄ат, кит с̄отыра, кит с̄отыра атс̄ат, х̄у-

рум с̄отыра ос ат с̄отыра в̄ерыста щирыл л̄акква-уртхатым касуңкве пат̄эгыт. К̄асың х̄отпа манапалыт в̄ерыста х̄айтуңкве к̄асащи, тув хасхаты. Тувыл х̄отыл акв щ̄ест̄ ос мир пуссын акв̄ёт товтыл х̄айталт̄эгыт. Н̄охпатн̄э х̄отпат пуссын муйлупсал муйлуптавет тах.

Тот яныг х̄отпат ос н̄яврамыт к̄ерим а̄мпың суныл яласаңкве в̄ерм̄егыт. Муй м̄ахум м̄агыс с̄авсыр ёнгилыт щ̄епитавет. Н̄яврамыт м̄агыс ёнгын кол рупитаңкве паты. Та колт т̄ан толтыглахтуңкв, ёнга-саңкв ос т̄эп̄ялаңкв в̄ерм̄егыт. Ты касыл кина сусн̄э т̄отап хосыт т̄ара суссылтаңкве патаве. Х̄айт̄н̄э м̄ахум п̄ослуңкве патаве. Щар п̄умаш хурит касн̄э стадионт н̄охханлавет.

С̄артын туп м̄анылат х̄отпат ос хаништахтын н̄яврамыт товтыл касуңкве ёхталасыт. Ан̄ юи-о̄выл кит т̄ал сыс м̄ан̄, яныгп̄ала х̄отпат пуссын акв̄ётмыл касуңкве патсыт. Округувт олн̄э м̄ахмануv̄ув ты в̄армалы сака м̄усты, т̄ан яныг щ̄агтыл касуңкве ёхтал̄эгыт. Ты в̄армалы сака ёмас, касн̄э х̄отпат м̄орсың порат а̄гмыл ёмтал̄эгыт. М̄ахумавет, н̄ан ос ты касылн̄ ёхтал̄эн. Касым пустагыл олункве пат̄эгын, н̄анан н̄матыр т̄арвит ат ёмты. Ты товтыл касн̄э в̄армалы ам ос ял̄эгум, ётыл ты урыл тах ханс̄эгум.

Николай МЕРОВ

Тав Лүсум мәньщи нъяврамаквет ханищтас

Мән рүпитан колувн Дина Васильевна Герасимова шалтсас ос мәнавн ёмас латың тотыс. Тав мөлавлн Свєрдловский область Ивдельский район Полуночный павылн мүйлуңкве ялыс . Та мат лүсум мәньщиянув өлэгыт, таимәгыс эква хосат тагыл тув ялуңкве сака таңхыс. Ань номтә тэлаг та ёмтыс.

Дина Васильевна та павылт ват сәграпнал этпос ват нупыл атыт щисланыл ос рётың юсвой этпос китыт хөталә мус олыс. Ты урыл тав потыртас: «Ювле хультым сатыт ам Полуночный павылнл ёхтысум. Ты павылн Ивдель үсныл иң ват нупыл нила вёрыста минуңкве эри. Полуночный – яныг павыл. Тот кит сөтыра арыгкем әлумхөлас олы. Павыл яныг школа ёныщи ос тот хұрумсәт савит нъярам ханищтахтәгыт. Интернат тот ос олы.

Ань та колт аквхуйплов мәньщи нъяврам өлэгыт ос ха-нищтахтәгыт. Тән Уш-ма, Кёрасколыңъя ос Ләпла мәньщи павылт-ныл тув тотыглавет. Савыңпәлә әгирищит-пыгрищит щәнь ләтңыл сака ёмщакв потыртәгыт, туп хансуңкве ос ловиньтаңкве ат хәсәгыт. Ам мощщан тув вөвиньтәлвёсум, тәна-ныл мәньщи ләтңыл ловинтаңкве ос хансуңкве ханищтасанум.

Школат тәнаныл ханищтан нә әтим, ос әгирищит-пыгрищит мәньщи латың элалы ханищтаңкве сака таң-

хәгыт кос. Тув ам Ханты-Мансийсканыл савсыр нәпакыт, «Витсам» мәньщи журналыт ос «Луимә сәрипос» газетат ёт тотсум. Нъяврамыт кәтн висаныл ос такем хот-щәгтсыт. Тән пүмшиг хурит суссыт, тәнки вәнә мәхманыл тот кәсаласыт. Акв газетат Татьяна Бахтиярова потре хансым олыс ос пөслум хуриянә тот өлсыт. Тән туп потрыт ловиньтаңкве ат вөрмысыт. Ләвёгыт, та мәньщит ләтңаныл мөт щирыл ләвияныл, төват щар ат торгамтахтәгыт.

Мән мәньщи ләтңанув савсыр әрнә рущ буквал хансыянув, тән та букват щирыл ловиньтыяныл ос таимәгыс мөт щирыл хұлыяныл. Аквтуп мөт ләтңыг ёмтәгыт. Мән ос нас ханьщувлым өлөв, нәпакн хансым щирыл мән ат потыртәв. Аквтох нәпакн букват

хансым щирыл ке потыртаңкве, тьи ма-нырсыр мәньщи ләтңув паты. Ань нъяврамытын ты өвылтыт потыртасум ос ләшчал ханищтаңкве патсанум. Ам туй пора мус тән палтаныл ялан-таңкве тах патәгум. Школа - интернатт рүпитан мәхум нъяврамыт мәньщи ләтңыл ханищтан хөтпа тув кинсәгыт кос. Хотыют эрың тув вәнтлуңкве кәсәщанув, сака ёмас өлнүв».

Дина Васильевна ләвыс, тот өлум хөталанә молях минасыт. Тав интернатт колнакыл майвес, матыр-әти әрнут тот пуссын олыс. Мәньщи нъяврамыт ёт кәсың хөтал рүпитас. Тав нәпак щирыл потрыт ловиньтаңкве ханищтасанә. Тувыл Татьяна Бахтиярова йильпи вәрум словарь-нәпаке нъяврамытын суссылтас. Тав лүсум



Никита Пакин



Мәньщи әгииг



Саша Анямов



Хащтэл тэлат варавет

Ханты-Мансийск үст РИЦ «Югра» колт
Хлэххал тотнэ махум ёт ныврамыт
 ёт рупитан нэт-хумит хонтхатыгласыт –
 «Кванториум» намп технопарк кұщай хум
 Андрей Сакаро, образование колт рупитан
 нэ Наталья Романова, тувыл кит мүй хотпаг
 Москва ўсныл ёхталасыг – философия наука
 доктор ойка Александр Попов ос Московский
 городской педагогический университетт
 научный сотрудиныг рупитан хум Павел Глухов.

2014 тэлт мәнполь
 этпост округт олнэ
 ныврамыт магыс эрнэ
 саккон щёпитавес – ань
 касың ныврам школат
 ханищтахтынэтэ конь-
 пал мот хотты тэла вос
 вәри. Мән олнэ мав
 янытыл ныврамыт ёт
 рупитан хотпат ты
 саккон щирыл тәра рупи-
 таңке патсыт. Шар
 мак номт таи – мот сыре-
 сыр тэлан касың ныврам
 ханищтахтуңке вёрми,
 тав номтың манос
 матыр сака молах ат
 торгамты, вәгталнувег
 олы. Ныврамыт пус-
 сын аквёет вос ханищ-
 тахтэгыт, нәмхотьют
 пөхан ул вос кетаве.
 Касың щань-ащь тув
 вос щалтсы, вос сунсы,
 ханищтан хотпа ёт вос
 потрами.

Наталья Романова
 тох лавыс: «2012 тэлт
 Россия Президентув лә-
 тың кетыс, ань сакати
 75% савит ныврамыт
 школа юи-палт хот-
 ати вос ханищтахтэгыт.
 Ам номсёгум, округув
 янытыл тысавит ныв-
 рам ханищтахтуңке
 ат вёрми. Төва павлыт
 тамле колыт атимыт,
 ныврамыт магыс нә-
 матыр кружок манос
 секция ат вәрыглаве,
 тән нәмхотталь ат
 ялантэгыт, нәматыр ат
 ханищтэгыт».

2015 тэлт йильпи тэла
 квалтапаптувес – ок-
 ругув янытыл нывра-
 мыт магыс «Квантори-
 ум» намп технопаркыт
 вос ўнттавет. Ань мән
 олнэ мавт кит яныг
 технопаркыг рупитэг,

Ханты-Мансийск ос
 Нефтеюганск ўсыт. «Газ-
 пром Трансгаз Югорск»
 хосыт тамле кол Югорск
 ўст ўнттувес.

2016 тэлт сұкыр эт-
 пост округ образова-
 ние тэла палт пуңкот-
 нэ махум «Сириус»
 центр ёт эрнэ нәпак
 хассыт, ты ханищтан
 кол Сочи ўст олы. Ок-
 ругт олнэ ныврамыт тув
 ялантаңке вос вёр-
 мёгыт, тот рупитан ма-
 хум ёт савсыр проек-
 тыт вәруңке вос
 ханищтахтэгыт, сыре-
 сыр конкурсытыт учас-
 тие вос пирмайтэгыт.

Александр Попов лә-
 выс: «Нән округынт
 мұтраң махум олэгыт,
 номтың кұщайт рупи-
 тэгыт. Тыт олнэ мир,
 ныврамыт ос мәнлат
 хотпат магыс тән сав
 ёмас тэла вәрёгыт. Таи-
 магыс ань школа ко-
 ныпал ханищтан тэлан
 ёмас щирыл вәрилын.
 Россия янытыл нән вәр-
 нэ рупитан мақыг олы».

Акван-атхатыглам
 хотпат «Кванториум»
 технопарк овылтыт сака
 хоса потыртасыт. Ань
 тыгыл элаль тот савсыр
 йильпи тэлат ныврамыт
 магыс щёпитавет, пус-
 сын сыре-сыр хащтэл
 намыл намаим олэгыт –
 Робот-, Аэро-, Газо-, IT-
 квантумыт, Геоинфор-
 матика ос мот намыт.
 Тән лавнэныл щирыл,
 ныврамыт сав эрнэ тэлан
 вос ханищтахтэгыт, хунь
 яныгмёгыт, ёмашакв рупи-
 таңке патэгыт.

**Светлана
 РОМБАНДЕЕВА**

мәншиит потыртанэ-
 ныл холыт ләтңыт хас-
 санэ. Ныврамыт тув
 хансум ләтңыт тәра-
 торгамтыяныл, нәм-
 хотталь ат таглэгыт.
 Ань Ханты-Мансийск
 ўст олнэ Ас-угорский
 институт рупитан ма-
 хум савнув тамле нә-
 пак вос щёпитанувыт,
 тыи сака эрнэ вәр-
 маль».

Лүсум мәншии ма-
 хум мощца хультыс.
 Китсат савит элумхөлас
 туп олы, ос тән пус-
 сын щань ләтңыл по-
 тыртэгыт. Лүсум мат
 ты ләтыңкёныл элаль
 ос вос олы, тав нәпакн
 хансуңке вос алымаве.

Дина Васильевна
 юв миннэтэ элы-палт
 ныврамыт манарн
 ханьщувласыт, ураль-
 таңке лавыс. Агири-
 щит-пыгрищит пус-
 сын стихыт, потрыт
 ловиньтасыт, мөйтыт
 мөйтсыт. Тәнанылн
 сака пұмыщ олыс. Ты
 тэла тав турсуй хаснэ
 утын ос хассанэ, ос
 манава хўнтлуңке
 мисанэ.

Мощёртын эква ос тув
 минуңке щёпитахты.
 Мән касың ныврамакве
 урыл янас потыр газе-
 тавт тах хансэв.

**Тамара
 МЕРОВА**



Библиотекарь нэ ос Дина Васильевна

Д. Перасимова вәрум хуриг

ХУМ ХӨТПАТ ЯНЫТЛАН ХӨТАЛ КАСТЫЛ

Лөпмус павыл маныщи хум

Маныщи хум Василий Васильевич Албин Хальүс район Лөпмус павылт ылы. Тав тот самын патыс, яныгмас. Оматэ Татьяна Семёновна, аги опарищ наме Шешкина, мөйт ванэ хөтпа ылыс. Нан ань элаль Василий Васильевич потре ловиньтэлын.

— Атям Василий Устинович Албин 1903 талт самын патыс, вора-ян, хул алышлан хөтпаг ылыс. Омам 1915 талт самын патыс. Тэн сас Лөпмусныл олсыг, тыт яныгмасыг, акван-минасыг. Ман колтаглулт лов няврам ылыс. Шар яныг Фома, маньтагыл атимыг емтыс. Тувыл Владимир, Анна, Нина, Макар, Виктор, Толя, Илья, Света. Ам шар мань, 1956 талт лүпта этпост самын патсум.

Атяв каңк ос апщи оньшас, Корнил ос Күшта. Омам Наста эщ ос Щерки ягпыг оньшас. Настатэ ос сав мөйт вас, мөйтыглас. Сорахтат Щерки ахт ылы, апшитэ тот пистхатас, таимагыс та ма тох та лававе. Щерки сасгум экватэ Наталы ылыс, аги опарищ наме Вынгилева. Тэн кит аги оньшигласыг, Марина ос Нина, ань Ягримт олэг.

— **Василий Васильевич, наң школат хөт хаништахтасын?**

— Овыл классытыт ам тыт павлумт хаништахтасум, Николай Михайлович Садоминын ос Нина Георгиевна Терентьеван хаништасу. Павлулт тонт руш хөтпа сав ылыс, Дудоревыт колтагыл ос мот ма-



В.В. Албин

хум. Няврам хаништан хөтпат тыг щань-ащаныл эт ехталасыт, павлулт олсыт. Маныщи латңыл потыртаңкв ханышувласыт, латңув торгамтасаныл.

Тувыл элаль Сортыңжат хаништахтасум. Тот школа ос интернат ылыс. Ман, Лөпмус няврамыт, пусын тув тотавев, тот та хаништахтасу. Оманув-атянув эт туй пум вурсу. Ман кит лув ошсу. Акв лувув лувколт ел-хисатас, щерматэ тув перхатам. Ман номсэв, тав ань хотталь ояс, лувколн минэв, лувув патум.

Ам ань амттем хультсум, каңканумувциянум пусын атимыт. Рут махманум олэгыт. Владимир каңкум нявраманэ, апганэ олэгыт. Нина увшим яныг агитэ, Иратэ, Салехард уст ылы. Корнил аким Күшта пыге Лөпмуст ылыс, сав няврам оньшиглас.

Мань порат ман Лөпың сыпт тахсысу,

лапка ляпат. Тонт сун сака ат ошсув, фанера лөмт катынпаттэв, тув талматэв, та нуйхатэв, манавн пумыш. Тованакт партыл суныт манти ваврев, керыл ратыянув, тох та тахсысу. Капка енгысу. Ам, Ваня ос Алёша Албиныг, Коля Таратов ман колув похат акваг енгасу, капка пахвтысу.

Элнаң ман касың этипала клуб кол похат енгасу – савсыр волейболыл, часовой, туйтыглахтасу. Сампыльтал эква енгил сака эруптаслу. Акв щес клуб кол манти лащлакв пунсылу. Тонт клуб күшаиг Василий Николаевич Сайнахов рупитас. Ман ань тув шалтэв, сампыльтал эква та енгев. Ханты-Мансийск ос Салехард усныл ань студент агиянув ехтэгыт – Тамара Оманова, Ольга Албина ос мот агит. Ман ос ам, Коля Лелятов, Володя ос Гена Хозумовыг, Юра



Василий нийв сағри

ос Алёша Варсаковыг. Ань енгункве патсув, ам самагум лап-нэгсалавесыг, иснас ляпан ровлахтэгу, иснастер хот-сакватаслум. Китыт хөтал ос тув минасу, ань юв шалтэв, ман лялтув кит фонарик нөх-пелаясыг, та пуввесу. Клуб күшай ос киномеханик Күшта тув туйтхатамыг, лавег – ман ань иснастер вос ваврилув. Тувыл иснас ваврылу.

Та порат няврамыт акваг енгасасыт, рөхтахтасыт. Ань шар ат суйтэгыт, аман енга-салэгыт, аман ати, танти та ваваныл.

Омав акваг мөйтыс, амщис, пес потырта маныр акваг потырталыс. Ел-хуев, тав мөйтуңкве та овылтахты. Ань хосаг емтыс, мөйтыт хот-эрувлахтасыт. **Хурум каңк манос Щирхум-ворхум** мөйт тай номилум.

Элаль Василий Васильевич мөйт мөйтыс, ам таве ел-хансылум, нан ань ловиньтэн.

Хүрүм каңк

(Маньщи мөйт)

Хүрүм каңк олсыт. Сөт кинсуңкве ми-насыт. Овлэт акв каңк ми-насыт. Яласас, яласас, ян нэглис. Сунсы, ямөтпалт хәп үнлы. Рөңхуңкве патыс. Сунсы, матум эква нәлув ты ёманты. Хәпын тәлыс, тав палтэ товыс. Тәлттыстэ, ми-нэг. «Шампылув-шампылув», — та товасы, тав ань тох намталах-ты. Пәг-пүхтысыг, ми-насыг. Колн шалтсыг, эква та рөңхалтахтас:

— Акарагум-щәщә-гум, пурт, пурт!

Ампыг квәлапасыг, кос төвмхатэг, хум ань ахвтасыг овумлас.

Тувыл китыт каңке ми-насыт. Ос акв та ян нэглис. Сунсы, я тапалт хәп үнлы. Рөңхувлас, матум эква нәлув ёмантас, хәпын тәлыс, тав палтэ товыс. Ос эква палт ёхтысыг, эква та рөңхалтахтас:

— Акарагум-щәщә-гум, пурт, пурт!

Ампыг кос пура-сахтэг, хум ос ахвтасыг овумлас.

Хүрмит әпшитән матыр хөнтис, пёрсалахтас, ос та ми-насыт. Ян нэглис, сунсы, хәп үнлы, рөңхи. Эква нәлваль ёмыс, хәпын тәлттувес. Эква лави:

— Отыр үнлын мән ул тәлән.

Тав эква әлмаястэ, хәпнәлн вущкастэ, такви тәлыс. Товасы, «Шампылув-шампылув». Тұпыл пуңкпаттат ләсатаптәлытэ, пөйтгы-пәлы. Тав товасы, о-ста: «Шампылув-шампылув».

Пәг-пүхтысыг. Эква хәпнәлн нөх-воратах-тас, ёмуңкв патыс.

— Апыг, нәг сәрыг-нув ёмен.

Туясастэ, нәлэ мән пәлхаты, нөх-вораты.

— Наңки ёмен, — пыг ләви.

Ёхтысыг, әвитэ пә-лыг-пүнсүңкв патыс: «Ширхум-вөрхум». Эква та рөңхалтахтас:

— Акарагум-щәщә-гум, пурт, пурт!

Ляпан хәйтсыг, пувумтасаге, ләгагән ак-ван-нәгсаласаге, сырн нөх-тагматасаге. Тот та щакарәлэг. Юв-шал-тыс, пүтэ пәйтахты кұр алат. Китыглахты:

— Маныр пәйтэгын?

— Нёвыль пәйтуңкве таңхөгум.

Эква әлмаястэ, пүт кивырн вущкастэ, та пәйтахты.

Кон-квәлыс, сунсы, кит ахвтас өлэг. Пәя тульёвлэ касайл сыла-ястэ, ахвтасыг кәлпыл пәссамасаге, каңкаге кәлп-полх сальгим нөх-сәйкаласыг.

Ань мөйт та оигпас.

Василий Васильевич яныг щәмьят яныгмас, колтәгыл махманэ пуссын әтимыт. Ань тактәт олы, ам ләвөгум, хотты нә хөтпа вос тотнувын, тав нас мо-вины. Мән, газета вәрнэ махум, Василий Васильевич хум хөт-па ялпың хөталыл янытлылүв, сәв ёмас сымың ләтың тавән ләвөв! Пустәгыл вос олы, Най-Отыранән вос үргалаве!

Светлана
РОМБАНДЕЕВА

Пёс йис мав эруптан нэ



Ты хурит хатань нэ Расима Алламетдиновна Ибраева пыге ёт пөслым олы. Тав Мегион үст пёс пормасыт акван-атнэ колт рүпиты, руш щирыл тох ләваве: Музейно-этнографический и экологический парк «Югра». Тот сака ёмас махум рүпитэгыт, соссан мирн яныг пәрыс тотэгыт. Расима Алламетдиновна кұчай вәңын нэг олы. Ам тав ётэ потрамасум, рүпататэ урыл китыгласлум.

Расима Алламетдиновна ләвме щирыл, тав щәнь-әщәге ос ханищ-тан хөтпанэ ёт мән-тә-гыл вөрн ялантәлыс. Пум вәрсыт, пил вәтсыт, ләхс атсыт, төванахт палатка түшталасыт, тот эт хүлсыт. Таимәгыс тав вөр ма, ят, түрыт сака эруптыянэ. Хунь тыт соссан мир халт рүпита-кве патыс, номтэ уш та кәмнямас. Ты элы-пәлт сәв тәл школат нәврам ханищтан нэг рүпитас.

Тав тох ты лавыс: «Соссан махум вөр мят өлэгыт, сыстам лыл-пәл-пыл лылтэгыт, улпыл таимәгыс тән палтаныл нәмат әгм сака ат ханы, ёмас номтыл ёмыг-тэгыт. Тән нәмсат, мән-ыр оныщэгыт, таил щәгтэгыт, Төрүм нупыл пөйкщэгыт. Матъёмас ам тән ётаныл вәйхатэгум, тәнаныл ос өлнэ мәнаныл ам сака эруп-тыяну. Пыгум ос ам холътум, соссан махум сака янытлыянэ».

Пыге наме Наиль. Тав ань Тюменский лесной техникумыт ханищтах-ты. Расима Алламетди-

новна Омский областьт Ошиваны павылт самын патыс. Атятэ Алламет-дин Чаматович, ома-тэ Шамси Хасимовна Ха-мидулиныг лов нәврам ошсыг. Атятэ мащтыр хөтпаг олыс — колыт үнттыс, ййвхәпыт ос мәнхәпыт вәрыс. Тав акваг ләвыглас: «Ам щёлың хөтпа — тасәвит нәврам оныщөгум, апыг-ришит оныщөгум». Тән ань вәт апыг оныщөг.

Расима Алламетдиновна школа әстламе юи-пәлт Тюменский сельскохозяйственный институтт ханищтах-тас, зооинженерный фа-культет әстлас. Такви ләвме щирыл, тав Эко-логия хөталт самын па-тыс — сүкыр әтпос 16 хөталәт, улпыл таимә-гыс ма-вит ханищты, өлнэ мятэ эруптытэ. Мөлты тәлт тав атпан тәлэ төвлыс.

Ты сымың хөтпан ам сәв ёмас ләтың ләвөгум, намхөталэтыл янытлы-лум. Сәв тәл пустәгыл вос олы, сөтыңыш, шу-ниңыш вос олы!

Светлана МАТВЕЕВА



Лөпмус павыл

Вāt тāl рӯпитан музей-кол



Музей унттум махум



Е.Д. Айпин



Р.К. Бардина ос Т.А. Клименова

«Торум Маа» музей унттым пāсыл ты тāl таквсы вāt тāлыг ёмты. 1987 тāl яныг таквс ётпос 30 хōталёт Ханты-Мансийск ўст ѓлнэ мир ос яныг кўщайт тув мўйлуңкве та вōввёсыт. Та хōталныл ты музей рўпататэ та ѓвылтавес.

Ты тāl ѓвил ётпосёт тот рўпитан махум яныг ялпың хōталаныл кастыл щёпитахтуңкв та патсыт. Тāн ань тāн-ти рўпитан коланылн ўсың мир ѓвил щёс тув вōвыгласыт. Ос потыртасыт, вāt тāl ювле хулытум порат ты музей хумус унттувес.

Ханты-Мансийск ўс сāt урам тармыл унттым ѓлы, рущ лātңыл лāва-вет – семь холмов. Я ля-пат ѓлнэ урамт сossaң махум музей унттуңкв ты номылматсыт. Ань ты хōтпат наманыл вāвет, тāн пуссын на-мың-суиң хōтпат – ты Юван Шесталов, Ере-

мей Айпин, Татьяна Молданова, Эмиль Косполов ос мōтаныт. Ос мāk яныг рўпата тāн ты вāрсыт.

Еремей Данилович ань потыртас, ты музей унттуңкв ѓвылта-маныл порат, тāн тох потыртахтасыт, тот сossaң махум ѓлнэ ко-лыт унттуңкв эри. Тав яныгмам мātэн минас, ѓлум вōр колэ такви махманэ ёт хот-лōста-ласаныл ос тыг ўсн та тотсаныл. Тыт ийльпи-иг унттысаныл. Ань ты кол музей кант ўнлы.

Ты кол норанэ сака осыңыт ос тāрвитыңыт. Ханты-Мансийск ўс

урамн тāн ты норыт тāнти нас харттысаныл. Нэматыр мāшинал тот рўпитаңкв ат рōвыс, мā сове ул вос сакватавес. Урам карсыг ѓлнэтэ магыс, сып нōңхаль минуңкв ос матыр нōх-тотуңкв сака тāрвитың ѓлыс.

Хумус та порат рўпи-тасыт, тāн ань мовинь-тым потыртасыт. Зоя Никифоровна Лозямова лāвыс, ты ханты кол ўнт-тувес, ос тиврёт щёвал пōщгуңкв эрыс. Ракт сāv ѓлыс, ос щёвал паттатэ вāрнэ магыс тёр пўщка эрыс. Тав юв ялыс, тит-тыг-яктым пўщка музей унттын мāн та тотыстэ. Кўр магыс кўртур ѓс āтим ѓлыс, ѓс юил тотыстэ. Ётыл ѓйкатэн лāваве, аман хотють тўлман-ты, тасāвит пормас юн āтим, хотталь та мина-мыт. Нянь вāрнэ кўр тэн Татьяна Александровна

Молдановал аквѓёт пōщгыстэн.

Кāсың тув ёхталам хōтпа тот рўпата ѓнь-щис кос, ос махум ат тōвылхатас. Эмиль Ива-нович Косполов мили-циян минас, тот лāвыс, каснаколн мощщан ўнтталан махум музей унттуңкве вос тётавет. Тувыл кāсың хōтал тав ат хōтпал майлувес. Тур-манколн ёхты, кāсың хум ёмашакв сунсытэ ос мāk ёр хōтпа та пёрии.

ППТУ ос СПТУ колыгт, №6 школа ханищтахт нйврамыт пуссын тув ёхталасыт. Тох акван-нётхатым, юрщхатым ты музей та унттувес. Округ мирколныл ты рўпата акваг уральта-вес, тот рўпитан махум лāввёсыт – ты музей молях вос унттыяныл, тув мўй мир тотыг-лаңкв эри.

Валентина ХОЗУМОВА

Лўимā сєрипос

(Северная заря)
№4 (1142), 22.02.2017

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Главный редактор –
Решетникова Р.Г.
Телефон (3467) 33-36-82

Заместитель гл.редактора –
Кондина Г.Р.
Телефон (3467) 33-22-72

Ответственный секретарь –
Уэль В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Подписано в печать:
по графику 22.02.2017 г.
в 9.00.; фактически
22.02.2017 г. в 9.00.
Индексы **04399, 54399**
Тираж **1750** экз.
Заказ **107**

Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.